

A

DAMMI

KHRIHFABU

LE

THLARAUNUN

**A
DAMMI
KHRIHFABU
LE
THLARAUNUN**

HRANG ZEL



**AZEL BOOKS
ULSAN, REPUBLIC OF KOREA
2021**

©Azel Books 2021

54 Jinseong 7 Gil
Donggu, Ulsan
www.azelbooks.com

All rights reserved. Hi cauk chung ummi cu a chuahtu lung tlinnak lo in
copy tuah, hmahtlak, le lam dang dang in chuah than khawh a si lo.

ISBN: 979-11-973525-1-5

For My family, With love

A CHUNG UMMI BIA

<u>BIAHMAITHI</u>	viii
<u>BIAHMAITHI</u>	ix
<u>DAL 1. BIATLANGVAN</u>	1
<u>1.1. Tlangtar</u>	1
<u>1.2. Thlaraunun Cu Zeidah a si?</u>	2
<u>1.3. Efesa Khrihfabu</u>	3
<u>DAL 2. THAWNGTHA INNHRAM: JOHAN</u>	Error! Bookmark not defined.
<u>2.1. Thawngtha Cu Zeidah A Si?</u>	Error! Bookmark not defined.
<u>2.2. Thlaraunun le Khrihfabu</u>	Error! Bookmark not defined.
<u>DAL 3. DIRHNAK CHANBIA: LAMKALTU</u>	Error! Bookmark not defined.
<u>3.1. Thiang Thlarau Cawlcanghna</u>	Error! Bookmark not defined.
<u>3.2. Efesa Khrihfabu Chanbia (Lam 18-20)</u>	Error! Bookmark not defined.
<u>3.3. Biatlang Kawmna</u>	Error! Bookmark not defined.
<u>DAL 4. PHUNG LE LAM: EFESA CAKUAT</u>	Error! Bookmark not defined.
<u>4.1. Biakam Thar Cakuat Sining</u>	Error! Bookmark not defined.
<u>4.2. Khrihfabu Cu Zeidah a si?</u>	Error! Bookmark not defined.
<u>4.3. Khrihfabu Thlarau lei Tinvo</u>	Error! Bookmark not defined.
<u>4.4. Khrihfabu Thlaraulei Tuanvo</u>	Error! Bookmark not defined.
<u>DAL 5. BU CHUNG NUN TINAK: 1 TIMOTE</u>	Error! Bookmark not defined.
<u>5.1. A Dammi Cawnpia</u>	Error! Bookmark not defined.
<u>5.2. A Dammi Thlaraunun</u>	Error! Bookmark not defined.
<u>DAL 6. ZUMTU NUN HRAMPI: 1 JOHAN</u>	Error! Bookmark not defined.
<u>6.1. Ceunak Pathian He Hawikomhna</u> (1:1-2:28).....	Error! Bookmark not defined.
<u>6.2. Dinnak Pathian He Hawikomhna</u> (2:28-4:6).....	Error! Bookmark not defined.
<u>6.3. Dawtnak Pathian He Hawikomhna</u> (4:7-5:12).....	Error! Bookmark not defined.

[6.4. Zumhnak Le Hngalhnak \(5:13-21\)](#) .. **Error! Bookmark not defined.**

DAL 7. KHINGTHLAI ZOHTHANNAK: BIATHLAM 1-3 Error!

Bookmark not defined.

[7.1. Biathlam Cu Zeidah A Si?](#)..... **Error! Bookmark not defined.**

[7.2. Khrihfabu Khingthlainak Biahmaithi](#)..... **Error! Bookmark not defined.**

[7.3. Khrihfabu Khingthlainak Tungtlang](#) **Error! Bookmark not defined.**

[7.4. Efesa Khrihfabu Khingtlai Zohthan](#) **Error! Bookmark not defined.**

BIATLANG KAWMNAK..... Error! Bookmark not defined.

CHERHCHANMI Error! Bookmark not defined.

BIAHMAITHI

Rev. Dr. Hrang Zel nih a cauk i biahmaithi tial ding i a ka fial tikah kai lawm tuk. Ka phu loh ti kai hngalh bu ah kai ot le ka tial. Azel he hin a no lioten kan i hngalh i kan i ngamh tlak. Hakha kan um lioah sangkhat kan si. Zion Baptist Khrihfabu ah kan um ti fawn. Cun thawngtha chim ah Khuapi le Sakta kan rak tlawng ti. Anih cu ano lioten Pathian a duh i Bawipa rian zongah a rak i pumpe. Baibal sianginn a kai zongah ai biatak lawlaw. Sehchih bu in ca a cawng i a teima tuk. Ka lungchung tein mah kan fapa hi cu mi menmen asi te lai lo tiah ka rak ruah cang. Ka ruahrup tein a tlamtlinh taktak.

Azel nih atu i a tialmi cauk hi a tam u cu HBA nih kum 2019 ah conference ah cawnpiak an rak sawm lioah a rak i timhlahmnak in ai thokmi a si. Kha lioah khan rak thei tuan ning law vai tel ve i va ngaih ve tiang ka duh. Atucu khanak kau deuh khan a chap i "Adammi Khrihfabu le Thlaraunun" timin bunh in cauk in a kan chuah piak. A cauk hi a huap a kau ngaithe. Baibal cauk panga pinah Biathlam cauk in Jesuh nih khrihfabu pasarih sinah cakuat a tialmi tiang a hei banh i a telh chih. Cupinah cauk ai chirchanmi hi uk 50 dengmang an si. Culakah kum 1718 lio cauk ai tel i kum 2018 i a chuakmi cauk zong an i tel. A huap a kauh zia van langhter ka duh bia. Cucaah hi cauk cu Lai Holh i chuahmi lakah a rum i a thukmi cauk pakhat a si. Rel tik ah Greek biafang, Hebru biafang le Mirang biafang ai telh tung nain cahtialtu nih thatak le fiangte in a hrilhfiah caah lungpem a fawite ko.

Hi cauk cu pastor, evangelist, Baibal sianginn cachim, Baibal cawng lio, khihfabu hruaitu le zumtu kip nih rel tlakmi cauk tha a si. Kan herh tuk fawn. Baibal biatak tein hlai lo in mah duhmi le uar zawng paoh Thiang Thlarau riantuannak i a chiatu hna caah siseh, cun minung fimnak, cawnnak, le thiamnak hi a za cang tiphun in ai la mi, Thiang Thlarau zong a co lo i Thlarau riantuannak zong ze i ai rel ter lomi, hna ca zongah siseh, theih le hngalh dingah a herh tukmi asi. Cawktlak, rellak le cawnpiaknak ah hmantlak cauk a si.

Hibantuk cauk tha a kan tial piak i a kan chuah piaktu Dr. Azel cungah kai lawm tuk. Hmailei zongah kan herhmi cauk dangdang zong kan tial piak in kan chuah piak rih seh ti saduh ka that. Atlam a tlin khawhnak lai zong Pathian nih lam hruai ko seh. Hi cauk a relmi paoh nih a dammi thlaraunun kan ngeih khawhnak lai Bawipa nih thluachuah kan pek piak ko seh. Amen!

January 2021
Yangon, Myanmar

Rev. Gordon Za Thio
Country Director
East West Ministry

BIAHMAIṬHI

Khrihfabu le *thlaraunun* tiah biatlang ngan pahnih kan zoh. Hman ngai mi biafang an si; nain, kan i fiang set hna lo. “*Khrihfabu*” vun ti ah, ze i hmanthlak dah na mitthlam ah a cuang? Zarhpi ni zing pumh maw? Darking tung ngeimi biakinn pi dah? *Thioloji* nih mit hmuh lomi *zunivasal* *Khrihfabu* le mit hmuh mi *local* *khrihfabu* tiah zumtu phu hmanthlak pahnih a hman. Kan cauk chung ah *zunivasal* *Khrihfabu* cu K-ngan in le *local* *khrihfabu* cu k-hme in kan tial. *Local* *khrihfabu* cu bu min kan chimnak lawng ah K-ngan in kan tial. *Khrihfabu* kong ruah tikah hi hmanthlak pahnih hi ruah chih lengmang a hau. Kan cauk ah biapi in kan zohmi cu *local* *khrihfabu* le *thlaraunun* a si.

Kan cauk cu Biakam Thar chung caholh phun nga a huap: Thawngṭha, chanbia, Paul cakuat, zapi cakuat, le Biathlam an si. An phun nga ning in *Khrihfabu* le *thlaraunun* kong sa cannak danh ah kan hmanmi Efesa *Khrihfabu* he pehtlaihnak an ngei cio. HBA Conference 2019 ah ka chim mi nakin tam deuh a huap. Conference ah kan telh lomi *khrihfabu* chung *thlaraunun* zong 1 Timote cherkhan in kan zoh. Cun, Biathlam chung i Asia *khrihfabu* pasarih hna Jesuh nih khingthlai zohṭhannak a ngeihmi hna zong kan bet fawn.

Lunglawmhnak hun tenh usih. Melbourne Chin Church (MCC) nih 2012 ah hi cauk suttung ruahnak cu ka rak chim. HBA Conference 2019 ah kan chimmi cu hlan ta nakin a tling deuh cang. MCC le HBA cung ah ka lung aa lawm. Cun, conference tlun inn a kan onhtu Hakha Baptist Church cung ah kaa lawm. Hi cauk hi chuak lak in a relmi Pastor Bawi Dua cung ah kaa lawm. Ruahnak ṭhaṭha a ka cheuh. Fianter awk tete a ka sawhpiak. Chin Christian University ah Hrang Zel-Kim academic award a rak hmu mi a si. Laica hi upatmi Pu Ram Mang nih a remh. Theology lei in kan ingeih chunhmi kan pa Dr. Shu Maung nih ruahnak le remh awktete ka chimh. Cun, bia hmaiṭhi dawh tein a ka tial piaktu Rev. Gordon Za Ṭhio cungah kaa lawm tuk. A dammi *thlaraunun* cu bia in si loin tuahsernak in an ka hmuhsak. Pathian nih an amah le an chungkhar cung ah thluachuahnak ruah cu sur ter ko seh!

Theih thiam ding zong kan nawl hna. Grik, Hebru, le Mirang biafang kan telh. Laiholh nih Grik biafang pakhat cu biafang pa hnihthum in a leh. Cun, a lettalam in, holh dang ah biafang pa hnihthum cu Lai biafang pa khat in a leh pah fawn. Cuaah, Grik le Hebru Baibal nih a hmanmi biafang le an bia kalning kha tehter duh ah an holh biafang pawl kan telhchihnak cu a si. Hna an hnawh pah ko lai, nain, lungsau tein rel ding ah kan sawm. *Khrihfabu* le *thlaraunun* kongkau ah a pelte an bawmh ahcun ka saduhthah a tling ko.

January 2021

Hrang Zel, ThD
Ulsan, South Korea

DAL 1

BIATLANGVAN

A hmasa bik ah Pathian ka thangthat. Kan tlangtar cu *thlaraunun* a si. Hi kong ah keimah thlarau nun cherhchan in chim awk ka ngei lo. Midang nakin ka thlarau hleinak a um lo. Thlaraunun kong cu pumpak nun le hmuhtonak si loin Baibal Cathiang cherhchan in chim ah a tha bik. Bible Conference zong a si fawn. Cucaah, “Khrihfabu le A dammi Thlaraunun” tlangtar cu Biakam Thar chung i Efesa Khrihfabu cung ah kan *hmanbilu* hlinh in kan zoh lai. Kan tlangtar le Efesa khrihfabu kan i thimnak kong in thawk usih.

1.1. Tlangtar

Kan tlangtar cu “Khrihfabu le Adammi Thlaraunun” a si. HBA nih an ka pekmi tlangtar cu “Baptist le A dikmi Thlaraunun, Baptist and Authentic Spirituality” a rak si. Lai Baptist nih thlarau nun an hmuhning le kalpining dothlatter an ka duh. “Khrihfabu le Adammi Thlaraunun” tiah ka thlen. A ruang pathum a um.

Pakhatnak, Lairam Baptist kongkau cu Lairam ah rian a tuan mi le Lai Khrihfa kong a hngal mi nih cawnpiak ah aa tlak. Keimah bantuk ramdang ummi le Laimi lakah rian a tuan lemlo mi cu Lai Khrihfa sining va cawnpiak cu chim lo, mi cawnpiakmi hmanh a hlei in fianh chin kan hau. *Lairam* le *Laimi* ah hmuichon loin Khrihfabu le thlaraunun tu kan hmuichon a si.

Pahnihnak, an ka pekmi tlangtar cheu cu *a dikmi thlaraunun* a si. Thlarau nun muru cu zumtu nun ah Thiang Thlarau riantuannak a si. Thiang Thlarau cu a dikmi Thlarau a si; a rian tuannak cu a dikmi a si colh. Nain, biaknak hmuhtonak (*religious experience*) paoh cu Thlarau rian tuannak tiah chim khawh a si lo. A riantuannak a si mi kha “A si lo” ti, le a si lomi kha “A si” ti cu Thiang Thlarau min a lakah hman an si. Cucaah, a dik le dik lo ti cu hrial kan i zuam lai. “A dammi” le “a zawmi” nun tu kan chim lai. Zeicahdah “a dammi” theng cu kan thim? *Lai Baibal* nih “cawnpiaknak a dikmi” (1 Tim 1:10; 2 Tim 4:3), “Bawipa Jesuh Khrih biatak” (1 Tim 6:3; BhT), le “cawnpiakmi biatak” (2 Tim 1:13) i *a dikmi* le *biatak* khi Grik in *hygiainō*, a ngan a dammi, a si. *Hygianō* hin Dr. Bawi Hu nih “ngandamnak he a thlakmi” tiah a lehmi Mirang “*hygiene*” khi a ra. *Hygianō* cu *a dammi* le *a dikmi* tinak a si. A zawmi theih cu a palhmi theih nakin a fawi deuh caah *a dammi* thlaraunun ti kan thim. A dikmi Thlaraunun ti zong a palhnak a um lem lo.

Pathumnak, Thlarau nih a umpimi, hruaimi, le zohkhenhmi zumtu sinak in zatlang le khrihfabu chung i nun khi kan tlangtar nih a sawh. Khrihfa le

khrihfabu chung ah Thiang Thlarau riantuanak chim kan i tim. I zohchun awk ah Biakam Thar chung i Efesa Khrihfabu kan i thim. Cuticun, Biakam Thar nih “A dammi khrihfabu le thlaraunun” kong a cawnpiak mi kan chim lai. “A dammi” cu khrihfabu le thlaraunun an pahinh sining fiantu a si.

1.2. Thlaraunun Cu Zeidah a si?

Mirang “spirituality” kha “thlaraunun” tiah kan leh. “Thlarau nun” tiah then loin “thlaraunun” tiah kan fonh. “Spirituality” cu “thlarau lei thil” ti sullam ngeimi Latin *spiritalis* in a ra. Hi “thlarau” cu Pathian Thlarau theng a sawh lo; minung thlarau, thlarau, le zumhnak lei thil zong a sawh. Thlarau nun cu Khrihfa phunglam lawng a si lo. Biaknak dang le Pathian a zum lo mi zong nih an ngeih ve. English-Chin *dictionary* pahnih leh ning aa dang. Dr. David Van Bik nih “thlaraulei thil i i zuamnak” a ti; Dr. Bawi Hu nih “biaknak lei zumhnak” tiah a leh. Hlan ah, thlaraunun cu biaknak lei i zuamnak he an rak then lo. Kan chan ah an hun then cang. “Biaknak lei aa zuam mi ka si lo, thlarau lei ah kaa zuam” (*I am not religious. I am spiritual*) tiah biaknak le thlaraunun cu aa ralchan in an hman. Cun, thlaraunun cu bu le zatlang nun in an then i pumpak nunnak ah an hren i pumpak thlaraunun ah an chuah. Minung thlarau le chunglei nunnak lei a si.

Khrihfa thlaraunun cu Thiang Thlarau nih a hrinmi, a hruaimi, le a cawnpiakmi nun a si. Thiang Thlarau huham le riantuannak ah aa pemi nun a si. Hihi Khrihfa thlaraunun cu thlaraunun dang dang he aa dannak a si. Thiang Thlarau nih a laihlung a tlaihmi nun a si caah Khrihfa thlarau nun cu Abrahamic biaknak a si ve nain phungbia ah aa hngatmi Judaism le Islam thlaraunun he aa dang fawn. Hakha Baptist Conference 2019 ah Dr. Chan Thawng Lian nih “minung thlarau” le “Pathian Thlarau” kong a chim. Khrihfa thlaraunun cu minung thlarau kha Pathian Thlarau tang ah chiah i nun a si.

Latin nih *spiritalis* tiah a lehmi Grik biafang *pneumatikos* cu *thlarau lei tinak* sifianh (*adjective*) a si. Thlarau in tamhmi nun a si. Minung thlarau, Pathian Thlarau le thlarau phunphun a huap. *Pneumatikos* cu Biakam Hlun ah a um lo. Biakam Thar nih voi 26 a hman; Paul nih voi 25 le Peter nih voi 1 an hman. 1 Korin nih tam bik a hman. Thlarau lei *pneumatikos* cu minung pumsa lei *sarkinos* he Paul nih a ralchan. Nain, nawlbia he a ralchan lo: “Nawlbia cu thlarau lei thil a si” (Rom 7:14) a ti. Cun, minung fimnak le thlarau cawnpiaknak a thleidan. Thiang Thlarau a ngei mi cu thlarau thil kha thlarau ning in a chimh hna. Zeicahtiah thlarau thil cu “Thlarau a ngei lomi” nih an hngal kho lo, thlarau lei lawng in hngalh khawh a si (1 Kor 2:13-14). “Thlarau a ngei lomi” cu “*psychikos anthropos*” a si; kokek pumsa duhnak le orfawhnak in hruaimi minung a si. Mirang nih “*worldly minded person*,” vawlei lei thil lawng a ruatmi an ti. Cun, hi zawn ah Grik nih *pneumatikos* (sifianh) le *pneumatikōs* (fianh thuan) a hman. Biafang in cun “o” le “ō” te lawng an i dang. Thlarau tamhmi nun le nundaan an si. Cu hlei ah *psychikos* (pumsa lei; *worldly*) le *pneumatikōs* (thlarau lei in, spiritually; fianh thuan a

si) ti a thleidan hna. Sifianh a si caah, Khrihfa thlaraunun cu Thiang Thlarau a ngeimi nun a si. Fiainthuam a si caah, Thiang Thlarau daan in nun daan a si. Nun lawng a si lo; nun daan hrim zong a si.

Khrihfa thlaraunun cu chunglei pumpak nun, a pheilei zatlang nun, le a tunglei Pathian he nuntinak a huap. Mah pumpak le khrihfabu dam nak lawng a ruat lo; Khrihfabu a ruahchih. Pumpak comi thlarau laksawng cu minung hawi thannak le thawnternak ah a hman (Rom 1: 11). Peter nih “thlarau biakinn saknak ah cun i hmang tuah u, *oikos pneumatikos*” (1 Pet 2:5) a ti. *Oikos* cu “inn” a si. *Lai* nih “Thlarau Biakinn” (LBT) a ti; a si ve ko. Nain, Peter nih “biakinn” hmanthlak hmang duh sehlaw, biakinn ti sullam a ngei mi Grik *naos* a hman hnga; *naos pneumatikos* tiah a chim hnga. *Naos* cu biaknak (*religion*) lei a thlir; *oikos* cu innchungkhar khel a thlir. *Lai* nih “khrihfa” le “khrihfabu” tiah chungkhar biafang “fa” le “fale bu” hmanthlak kan hman bantuk in Peter nih “Thlarau inn” tiah a hman. Pumpak pum i peknak in bu ca ah santlai le thahnem rak si cio kha Khrihfa thlaraunun cu a si. Thlarau nun cu Thiang Thlarau hruainak tang ah nunnak le nunning a si.

1.3. Efesa Khrihfabu

Efesa Khrihfabu kan i thim cu a tawinak in kan chim lai. Biakam Thar ah cauk 27 a um. Phu nga ah an then: Thawngtha, Chanbia, Paul Cakuat, Zapi Cakuat le Biaphuan. Thawngtha cu Matthai, Marka, Luka le Johan an si. Chanbia cauk cu Lamkaltu a si. Cakuat ah Rom in Judas tiang (uk 21) le Biaphuan cu Biathlam an si. An phu li hin Efesa Khrihfabu he phun khatkhat in pehtlainak an ngei cio. Cucaah, Efas Khrihfabu cu kan i thim.

Khrihfabu cu Thawngtha (Gospel) chung ah a dir. A muru in chim ahcun, Thawngtha cu Jesuh Khrih a si. Cauk in chim ahcun, Thawngtha Cauk pali (Matthai, Marka, Luka, le Johan) an si. Thawngtha cu Khrihfa zumhphung *fawngdesen* a si. Khrihfabu innhram ca ah Johan Thawngtha kan zoh lai. Zeiciahtiah, Johan Thawngtha cu Efesa Khua in tialmi a si, tiah hlan chan Khrihfa hruaitu hna nih an chim. Cucu, zumhtlak a si. Kan tlangtar he aa tlak in Thiang Thlarau kong le a riantuannak kan zoh lai. Efesa in tialmi Johan Thawngtha cu an khrihfabu zumhphung le *fawngdesen* ah la usih.

Khrihfabu cu dirhnak chanbia (history) a ngei. Lamkaltu dal 18-20 ah Efesa Khrihfabu dirhnak chanbia kan hmuh. Lamkaltu Cauk cu lamkaltu pawl, a bik in Peter le Paul, *mission* an tuannak a si; nain, Khrihfabu dirhnak le Pathian bia karhnak ah Thiang Thlarau riantuannak cauk tiah a dik deuh. Cucaah, zumtu cung ah Thiang Thlarau a tlunnak kong kan zoh hmasa lai. Kap khat ah, Thiang Thlarau a “tlaknak” ah Jesuh min a lak ah a hmangmi le Bawipa Lam hnahnawnak petu zong an um. A dang kap ah, Thlarau laksawng a co taktak mi an um. Khrihfabu an i tlawng; bia an i cah. Cucaah, Lairam khrihfabu chanbia kong ah Efesa khrihfabu cu zohchun tlak a si. Lamkaltu dal 18-19 kan hrilhfiah lai.

Khrihfabu nih *phung le lam* a herh. A dammi zumh phung (*doctrine*) le zulh phung (*practice*) a herh. Hi kong ah Efesa cakuat kan zoh lai. Efesa Cakuat cu khrihfabu, a pumpi, sin ah a kuat. Biakam Thar Cakuat nih zumhphung le zullhphung tiah then hnih a ngeih. Phun dang in chim ahcun, *thioloji* an chim hnu ah *khrihfa nun* an chim. Zumhphung cu zullhphung le nunphung a si. Efesa Cakuat nih khrihfa cu zumphung le zullhphung a kan cawnpiak. Khrihfa zumhphung cu Khrihfabu chung le innchungkhar ah nunphung ah hun siter a herh.


Cun, *Khrihfabu chung nun* tinak thlaraunun zong a herh. Cu kong cu 1 Timote ah kan hmuh. 1 Timote cu Paul nih Efesa khua ah a ummi pastor Timote sin ah a kuat. Khrihfabu chung i zohkhenhnak, i hruainak, le rian a kan cawnpiak. Conference lio ah kan chim lomi 1 Timote kan telh.

Khrihfabu cu khrihfa nun hrampi (Basic Christian Life) ah a kir than a herh. Khrihfabu cu a nung i a thanngmi Khrih pum a si. Asinain, local khrihfabu cu a thanng deuhdeuh, zumhphung le nunphung ah buainak a tam deuhdeuh. Piang soal le pial soal zong an hung um. Thlarau a cherhchan mi paoh le Jesuh min a chim mi paoh kha zumh awk an tha ti lo. Zumhphung dik le thlaraunun tak theih le hliah a herh. Cuticun, khrihfabu cu a dammi *khrihfa nun hrampi hngalh* le *kir hnawh than lengmang a herh.* Baibal biatak ah kir than kan herh. Cu cu Efesa in Upa Johan nih Asia peng khrihfabu sin ah a tjalmi 1 Johan Cakuat nih a kan cawnpiak. Khrihfa nun hrampi a si mi a dammi zumh phung (*orthodoxy*), zullhphung (*orthopraxis*), le a fekmi hngalh kong ah lamkaltu hna cawnpiaknak ah kir than ding in a kan sawn. Thlarau phuannak paoh Thiang Thlarau hmual a si maw? Pathian he hawikomhnak a ngeimi cu zeitindah kan hngalh khawh lai? Cu bantuk, zumhphung le phunglam kong ah 1 Johan nih a chimmi kan zoh lai.

A dammi Khrihfabu le thlaraunun cu khingtlai zohthanak (evaluation) a ngei. Minung, khrihfabu le thlaraunun cu thatnak le chiatnak, than nak le dernak an ngei. Cacaah, i zohthanak le khing i thlainak ngeih a herh tawn. Efesa Khrihfabu cu a tho thanmi Jesuh nih zohthanak le khingthlainak a ngeih hna. Cukong cu Biathlam 2:1-7 ah kan hmuh.

A dammi Khrihfabu le thlaraunun nih Thawngtha, chanbia, zumh phung le zulh phung, zumtu nun hrampi, le khingthlai biaceihnak a herh hna. Cucu, Baikam Thar nih Efesa Khrihfabu hmang in a kan cawnpiak. Efesa Khrihfabu cu a *fawngdesen* ca ah Johan Thawngtha a um. Chanbia cauk Lamkaltu nih Efesa Khrihfabu dirhnak le thawkka thil sining a chim. Khrihfabu chung ah i nunpi awk phung le lam, le i zohkhenhnak kongkau ah an khrihfabu le pastor sin ah kuatmi ca an um. Cun, zumh phung le zulh phung kong ah pian sualnak le pial sualnak a um nakhnga lo Khrihfa nun hrampi ah kir than le thlaraunun ah i lunnak ngeih a herhnak chimmi 1 Johan Cakuat a um. Cun, Biathlam nih Efesa Khrihfabu hmang in khrihfabu zohthan khingthlainak phun khat a kan hmuhsak. Hi hna ruang ah, Efesa Khrihfabu kan i thim.

BIAKAM THAR CAUK



EFESA KHRIHFABU

